



Vertical text on the right edge of the page, likely bleed-through from the reverse side. The characters are faint and difficult to read, but appear to be arranged in a column.

稽留山集目錄

第九卷

微帶集

詩七十六首

壽青霞大兄

壽周圯公進士尊人繩翁先生

壽

洪母

賀孫德州海門先生舉子

癸卯春漫詠四

首

癸卯夏復之燕山辭家作

嘉禾遲張螺浮黃

門舟未至訪陳子木孝廉兼與長公堯夫

北發有

感

張漢賓小像索題

雨泊楓橋還訪自天和尚

瑞光方丈

過繡虎吳門寓園留贈

百花洲 虎

丘 真孃墓

和張螺浮黃門登虎丘山寺作卽次

元韻

再疊前韻

惠山泉亭

金山寺

同螺浮

登金山和王阮亭壁間韻 夏日九僊兄招同螺浮
暨諸子泛邗溝望平山堂漫賦八絕句 重泛邗溝
八絕句兼贈武昔 淮陰舟次遇顯亭假歸賦贈四
首 釣臺 漂母祠 自公路浦渡黃河 車遙遙
同螺浮黃家營道中作 蒙陰道上 經泰山下作
到燕山投宛委先生家值初度賦贈 芝麓先生
重拜御史大夫賦贈四首 懷丁葑園二首 七月
望後陪宛委先生暮過長椿寺登瑞光閣招吳賡庵
先生同眺西山作 送胡敬懋之黔中 敬哉先生
招飲賦謝 送龔祖錫出宰安西 爲汪茗文賦

和陶公飲酒詩十首 送俞子政佐牂牁長官司
戲作焦仲卿詩補 贈熊雪堂少司馬移疾歸里

稽留山人集第九卷

癸卯

詩七十六首

壽青霞太兄

武水陳祚明肩倩氏著

春蘭盈通谷宅幽含華滋詎歆克堂芳獨媚丘壑姿托根
自有所秉性各有宜吾兄璠璣珍製錦暫一施騰達士元
林盤錯永嘉時耕桑輯無鳩詩書教遺黎有璞衆欲剖韞
匱善藏之臨川築衡門樂水恆忘饑知足以爲貴緩步聊
當車幸有種秫田可廢責子詩獻歲土膏動墻梅花離離
清酒湛芳樽親朋庶同持呼兒校文選命僕治鋤犁卽此
遂忘老王喬與等期

壽周圮公進士尊人繩翁先生

我從燕山歸始卜吳山居比鄰有俞生泰屣履同襟期俞
生室如斗琴書靜虛帷披帷其人在好古懷黃義門無俗
士駕壁有周子詩大雅委榛莽綺麗風已卑巧言如笙簧
淫靡安足師周子達者流雋永有餘思在晉慕陶潛在唐
愛王維金閨況早達名山文在茲未壯年齒富朱顏多華
滋高堂髮始艾愛日方融怡四明山玲瓏月湖水漣漪布
席延衆賓芳醴行不遲長吟諧比竹朗詠閒彈絲我有巴
人曲難和陽春詞矢音托清風微爲君子嗤

壽洪母

名都有甲第母德儷齊姜朱門臨廣衢易知復難忘結褵
奉燕婉拖巾君子堂治葛理鳴機采蘩盈深筐視膳良和
柔舉案何矜莊駕車卽遠路千騎往朱方空廬託狹巷織
作義所當朔風動簾幙秉燭夜未央毛詩旣口授周禮亦
諮詳賓客停車過殷勤羅酒漿延譽各成名辭賦聞上京
旣裁柳下誅旋諷竺乾章旌華坐悟空弄孫以徜徉二子
金閨才羔鴈列兩廂素首被朱顏門戶爛生光

賀孫德州海門先生舉子

禹航北門通德里誰其居者天下士致身未展學古力乞
休但道歸田美竹間開第三徑幽閉門高臥無所求堂下

種花紅滿眼堂上圖史盈牀頭客來揮麈譚清虛客退隱
几還著書丘墳每搜三代上細帙不啻五車餘有時躡履
走都市仲任徘徊立書肆雲籤秘笈百金買入手把玩聊
快意居纔容膝食果腹求田問舍非所欲百城坐擁樂何
如囊中無金願亦足所嗟五十猶無兒積書將使何人讀
燕姬彈箏吳姬歌春宵燭紅卮酒綠聞說夫人含笑看關
雎不妬古所難周詩無乃周姥作男子相爲未是謬居然
夢蘭遂生子出門入門看不已寧馨英物真在抱實訂啼
聲遽盈耳閨中夫人何所云此事實賴卿有勲得子皎皎
若東日一身以外皆浮雲昨歲我泛苕溪棹登君之堂與
君笑石麟携至手摩頂方面大耳果英妙五十生兒莫嘆
晚八旬強健日頗遠轉盼卽看與戶齊老去應教弄孫穩
燕姬雜佩佩宜男吞鳳何妨復再三小星個個爭承寵筋
力須知老更堪

癸卯春湯詠四首

故里湖山好歸來兩見春可憐招隱賦難尼好遊人綠岸
初舒柳清波欲曳蓴薊門終策馬風捲落花塵

其二

湖上春光少薜蘿漸綠臯離離看翠竹短短綴紅桃禿樹
仍抽葉新萸亦解苞來游無緩步嘶馬逐人驕

其三

水曲連山曲溪雲雜谷雲所思春樹密乍有曉鶯聞酒舫
歸何少游人暝易分郭門初月閉蕩漾起波紋

其四

尚憶登臨日千峯翠藹浮水光明隔樹柳色暗藏舟燈火
遊清夜亭臺繞碧流江南佳麗地無比是杭州

癸卯夏復之燕山辭家作

更復辭家去飄然易遠行別憎兒女淚詩苦弟兄情盡室
山樓小依人水艇輕孤身耻干謁莫道有逢迎

嘉禾遲張螺浮黃門舟未至訪陳子木孝廉兼與長

公堯夫

卽傍舟船入洛遲因尋故友慰離思街傳角里高人隱杖
有元方名士持遶砌葵花紅映席行盤蔬甲碧如絲舊交
存歿無消息湖上烟波似昔時

北發有感

馮驩老去尚無家飄泊依人托後車到日更傾燕市酒客
星那逐漢臣槎舟浮震澤滄波濶家遠吳山落照斜此去
不因游五嶽予心可是愛烟霞

張漢賓小像索題

翩翩公子珥貂家獨向山橋踏落花圖得修髯真散朗行

來烏帽任欹斜郊園綠萼飄兼雪甲第丹樓望似霞愛靜
知君用幽意不將氏族傲瑯琊

雨泊楓橋還訪自天和尚瑞光方丈

津梁泛泛欲何之水宿徘徊憶本師精舍烟霞開社迴扁
舟風雨遶城遲關山杖策心難定塔院焚香偈暫持便學
生公臺上石偶來聽法不多時

過繡虎吳門寓園畱贈

不知天下士患難飽經過東海田園少南冠歲月多小軒
依水竹廢沼對風荷失路翻憐我淒涼彈鋏歌

百花洲

城陰野水百花洲翠柳依依碧草柔旋築園亭迷故址不
堪麋鹿更來游

虎丘

拾級步嶙峋花宮跡已陳浪傳丘踞虎不見石如人花木
青山市舟船綠水津道傍誰氏宅千載說王珣

真孃墓

莫問真孃墓平原萋草荒鶯疑絃管滑花學綺羅香絕世
應難得千秋爲爾傷惟餘嗚咽水長日繞河梁

和張螺浮黃門登虎丘山寺作卽次元韻

名彥饒雲情花宮攬石狀攀林過岸曲捨舟漾河上不逢

吹簫幽緬想試劔壯未忘葛亮吟莫放尚平杖

再疊前韻

石敞坐人姿壑陰踞虎狀好風鳴樹間返景射塔上此山
歷今古屢至無少壯濟勝及盛年蹉跎畏扶杖

惠山泉亭

客程遙望惠山烟今日河橋泛小船水市雲牀青麓下釀
家春甕綠楊邊破愁須飲三千斛消渴常烹第二泉更欲
登攀愁日暮花宮丹闕隱曾巔

金山寺

江聲萬里赴朝宗水面嶙峋插翠峯斷石崩波蹲虎豹驚
濤劈硤鬪蛟龍鉦笳縹緲帆檣轉金碧參差殿閣重絕頂
風烟悲極日夕陽漂泊倚孤筇

同螺浮登金山和王阮亭壁間韻

巉巖峭石割江流高閣凌空瞰十洲客過定須携綵筆我
來乍喜附僊舟雲山瓢衲虛招隱壁壘旌旗未放愁日暮
潮音鳴兩岸乾坤浩蕩一沙鷗

其二

九州詞客千秋賦殿壁廊崖石盡磨滾滾人隨流水去飄
飄帆競夕陽多來遊並許青雲彥寡和真成白雪歌獨上
妙高山頂望澄江如練起曾波

夏日九僊兄招同螺浮暨諸子泛邗溝望平山堂漫
賦八絕句

廣陵城下古邗溝
亭榭鶯花繞碧流
日暮維舟看柳色
不知何處是迷樓

其二

千秋佳麗羨江都
百戰孤城近又蕪
稍喜亭臺仍繞郭
風光得似昔時無

其三

綠岸紅橋放小船
荷花拂水柳含烟
飄然遂欲乘風去
見說同舟客是僊

其四

城裏人家城外園
枕岡依郭水當門
維舟盡欲穿花入
看竹應須到日昏

其五

畫楫蘭樽出郭游
歌童簫鼓載前舟
偷窺玉貌藏花底
風動湘簾不上鉤

其六

隋苑荒涼空綠郊
清川斜遶蜀岡遙
游人日暮吹簫去
髯鬚當時廿四橋

其七

山色江南不忍望廣陵信美是他鄉臨流且醉邗溝月莫
上平山太守堂

其八

山川花鳥自千秋載酒臨風只暫遊簫管莫辭催玉琰烟
波他日夢揚州

重泛邗溝八絕句兼贈武昔

玉壺美酒却重携歌吹隨流到竹西已有新花開似錦拚
同舊侶醉如泥

其二

近水人家認酒船新晴亭閣羃輕烟爲耽明月連宵酒不

負薰風長夏天

其三

不爲頻來載綠罇逃津卽恐似桃源小東門外曾遊處更
向陳園定李園

其四

郭繞叢花岡作屏笙歌畫舫襍紅亭重游莫道無多景隋
帝曾勞翠輦停

其五

慣識房櫳近水灣忽聞笑語出花間旗亭屢過終須上別
業真幽不許攀

其六

岸上垂楊水上花東家亭館接西家依然風景紅橋外傍
樹偏增釣艇斜

其七

歌聲已是翻新曲酒令應須改昨宵月出城頭人未散千
門燈火照蘭橈

其八

飛蓋羣賓托後車烟花絃管樂何如揚州莫羨堪携酒魏
關于今待上書

淮陰舟次遇顥亭假歸賦贈四首

高名青瑣客始作列卿還濟濟除書晚雍雍家食閒白華
歌井里蓴菜飽湖山簫鼓長淮過僊舟不可攀

其二

親寧宜愛日官補正需年庭稅籃輿暇身披綵服鮮名山
書合就魏闕疏爭傳入膳江魚美非關憶鱸還

其三

內擢翻歸去乘閒愜遂初湖山元亮宅花竹子雲居酒興
耽彌甚君恩報莫疎爲卿良不易更講治安書

其四

我出逢君返行踪似避人亦知還里樂此去傍誰親蓮葉

西湖水蓬科北地塵升卿須幾載或恐尚迷津

釣臺

逝水長淮處荒墩剩釣臺艱難投主分揮斥將兵才齒劔
雄名忌藏弓帝業開富春江水碧垂白客星回

漂母祠

徒步饑寒士殷勤一飯恩才寧識名世哀獨爲王孫報已
千金重祠今異代存古來堪將相不必給饗殮

自公路浦渡黃河

淮浦津梁水驛迴千家烟火隱樓臺悲風急挾河聲走落
日徐將帆影來崩岸蛟龍眠自穩荒原兕虎去仍哀維舟
杖策愁生事苦恨鷄鳴五夜催

車遙遙同螺浮黃家營道中作

車遙遙路遲遲兩羸將車疾於鳥徒御策馬行相隨金閨
客還朝去赤日揮鞭不得駐五里一酌道傍泉十里再息
堤邊樹黑雲驅雨河上來車前烈烈鳴驚雷如拳之雹飛
撇屑羸馬人立嘶悲哀車遙遙到村舍濕衣淋漓走車下
遙看燈火近黃昏便煮黃梁待深夜已無一寸衾裯乾放
腳低迷臥狼藉車遙遙行不已北望燕山二千里行人惴
惴帶弓箭盜賊耽耽睨行李君今游宦輕關山我獨何爲
在泥滓

蒙陰道上

表裏山河險齊關十二牢西流泗水曲東抱萬峯高風雨
通鳧嶧雲霄插具敖大才悲管子霸業爲誰勞

經泰山下作

鬱紆循長麓崩嵬瞻峻嶽洩雲觸石吐員景垂巖落絳氣
殷層霄鳴泉墜陰壑澄嵐盤空濛疊壁立峯嶸青蒼藏寒
松丹漆蓄僊藥封壇闕金泥祠宮麗朱牖吶萑香爐烟鞢
鞞鈞天樂旆旆翳雲虬遼遼度笙鶴玉女駢斑璘青帝旂
歛霍天門闕窳窳日觀俯寥廓壇連通崑丘溟滓窮度索
太乙假升中坤維奠東畧踐阪惋求侶望巘聊拊僕谷汲

謬微尚峽臥乖宿諾營道疲驂駢謀食儕燕雀已嗟歸安
適恐昧色斯作息交詎粵己茲理問冥漠

到燕山投宛委先生家值初度賦贈

北風冥冥飛雨急泥塗客子征衫濕到門投鞭曳裾入主
人將迎如不及自我襍被歸錢塘二年不升君子堂窻前
最愛吳山碧夢裏不忘燕山蒼燕山帝里黃塵道冠蓋
交游多草草繁華豈繫隱者心欵曲獨有先生好甍歸祇
戀信陵恩未合吳山掩華門更讀相思數行札人生那得
懷家園東西南北無不可世上何人更知我妻子携來此
事難蒯緱隨去茲行果六月燕山雲吐吞翻盆之雨長河

奔堂下流潦已三尺飄風吹簾燈欲昏挑燈把酒更斟酌
笑語沉沉飲酒樂不知雷電方崩騰但覺形骸俱脫畧五
畝之園鑿小池中安亭館花參差主恩移疾容高臥行
散林間白日遲舊是西園辭賦客早晚高齋對泉石滑稽
聊復一開顏論文可許真莫逆黑頭三十七年身維嶽生
申在此辰滿堂絲竹歡未已虛左復召夷門人夷門人髮
已白年年許醉薰風席百歲能陪召保游須向名山煉金
液

芝麓先生重拜御史大夫賦贈四首

投閒久繫蒼生望執法初歸紫禁班當代文章推北斗

十年絲竹起東山偶披品服烟霞氣自捧封章霄漢間
相功名頭尚黑將因高臥駐朱顏

其二

左遷索米滯燕臺先帝偏畱宰相才此日崇班還特進當
時初服美歸來賜環實賴扶新主弄印誰堪陟上台欲
贊垂裳看直諫不妨東閣更徐開

其三

晨朝言事玉階趨武帳應嚴汲大夫歸署啼鳥依列栢入
朝鳴鳳據高梧上公動色停聲樂天子和顏問典謨臣
節已知關社稷君恩未許念江湖

其四

朱門玉澗水粼粼授簡西園托後塵暫去松風思命筆重
來槐影映垂紳耦耕去住憐孤客獨坐安危寄大臣卽恐
自公無暇日長裾欲曳重逡巡

懷丁葑園二首

嚴譴憐才子遼東不可居歸難隨塞鴈食可得江魚謫戍
真無罪窮愁合著書關山音信隔休訝故交疎

其二

可能逢雨露生入玉門關蕙苴寧充腹人稔倘駐顏戍徒
知最社逐客盡上聲先還莫竟投荒老吾詩孰與刪

七月望後陪宛委先生暮過長椿寺登瑞光閣招吳

麇菴先生同眺西山作

落日愛登樓花宮步屨幽楚材邀作賦山色對初秋行藥
拋青簡鋤瓜俯綠疇莫教明月上攬我望鄉愁

送胡敬懋之黔中

十上書不收三獻璧仍棄經術空餘四海名文章自是千
秋事可嗟簡牘枉見排可憐摸索非相置不教主者見君
文未到榜前前制淚從來賦子虛疇昔覽穰苴賈誼元年
少相如亦不如風塵一劍隨征幕鼙鼓千山老曳裾璧水
談經同輩少金門搖珮故交疎三十年來還挾策八千里

外復將車那教躑躅驅羸馬合繻更走關門下淪落終然
遭遇遲簡練非因說力寡鄉園欲歸不得歸悼亡況復淚
沾衣黔南節度偏相召便逐秋雲旅鴈飛

敬哉先生招飲賦謝

君家世擅鳳皇池同拜春卿自一時太傅懸車杯酒暇元
方持杖錦衣隨登山不廢花前履名客常銜竹下卮十載
公門曾托乘重來更許和新詩

其二

西園花柳曳長裾捲幔真看左席虛老病風塵終作客窮
愁歲月未成書青山湖上歸仍出白首樽前貴不疎酒罷
更開朱邸送布衣偃蹇竟登車

送龔祖錫出宰安西

列宿天垣傍羽林西來飛鳥更携琴驅車花發秦川曉卷
幔雲生華嶽陰見重循良宜上考莫嗟撫字畏勞心卽論
渤海君家事鸞鳳應須起十尋

爲汪苕文賦

茂苑才人重漢京一官冗散謫司城五陵俠少多相避可
是當年京尹名

其二

城門校尉步青驄赤棒鳴騶意氣雄日暮探丸君莫問侯

家邸第五雲中

和陶公飲酒詩十首

予讀陶公飲酒詩耶
復愛之輒有斯和

未衰已邁病對酒
歎所歡貧賤知攝生
異患庶不干和衷
順人情保己良獨難
委運任所如悲來忽
無端烈風鳴牖
戶奄忽逢歲寒
飲食各有時俛仰
戀所安

其二

取醉昧昏曉得飲亦不辭
脂車秣吾馬悵悵將何之下土
非可居赤松豈吾欺皐夔
何鼎鼎功業銘常旂年
徃名亦亡徒爲達者唾

其三

昔我常迷方頗好干世術
稽古乃懷榮孜孜理緇帙
上書棄不收廓落守蓬室
處賤信寡尤逢時多所失
旅舍風鳴條牀下啼蟋蟀
一杯已復醉與物無憎嫉
卒歲終歎營道遙此中畢

其四

衣食各有務而我胡棲棲
持觴不能傾餘妻伐肝脾
死生命矣夫何當念寒饑
澤雉戀山梁白鷺下清溪
俛啄仰復鳴習苦不慮疲
衆人自營營天運不可齊
固窮宣父訓將爲達者規

其五

在羣念如獨惘惘意不懌百年忽易道安得遂所適親串
已長夜歡愛良棄擲車馬驟狹邪徘徊日西夕來者無停
轅去者驚斷輓來者自成今去者自成昔寄生日暮間杳
杳爲遠客川原莽迴薄所至有泉石歎歌懣所遇千秋晤
遺迹

其六

鬱鬱狹邪路寥寥空室居閉門謝塵鞅還讀古人書一飯
聊得飽長齋厭時蔬濁酒四五杯適情不願餘幸無物役
牽真想慰其初朔風鳴樹枝落葉飄庭除九原不可作掩
涕空歎歎

其七

吳山何迢迢故國隔山河客子歸還難長夜徒咨嗟疇昔
命清樽兄弟人匪宅山堂眺平湖虛牖梅始花嘯歌洽吾
趣深室閉烟霞驚蓬逐衝飈零落天一涯寒鴻唳元宵烏
鳥萃霜柯晶晶天宇肅初月耿明河慨想發長謠迫此勞
者歌

其八

少小負俗累閱世多苦辛負郭無一畝豈不思歸田士隱
悲賤身遠游歷山川弟姪愼別離妻子啼饑寒三秋闕書

札不寄一囊錢衡門下重關墨突無爨烟命也當柰何客
子徒屯適有酒且獨持擊筑方游燕十杯兀已醉寄情於
簡編陶公有三徑不得與此焉

其九

門有車馬客似是平生素昵昵前致詞綢繆話親故旅人
古所悲廓獨感霜露宛洛一以游金閨可翔步固窮諒獨
難屢空非殆庶我有盈樽酒斟酌窮夕暮四時異消息成
功會須去逃途稍迴駕圓鑿聊改度大丹不可成沈吟爲
誰故反爵爲君傾懷情未敢訴本性各有之將深履冰懼

其十

弱齡愛閒寂忘己師古人齊物讚莊周抗志懷隱淪中更
喪亂俱茫茫傷我神膏澤凋朱顏素髮不復鬢但恨乞食
難驅車干要津武林山峯萃滄江水粼粼有田不歸耕負
此隴畝民舉杯萬感集涕淚沾羅巾

送俞子政佐牂牁長官司

崇情符逸尚宦轍寄游躅蕭然歎歌興豁爾登臨日一檄
聊自欣三語亦何惡駕言出橫門崎嶇之貴竹江亂越空
茫嶺踐躡曾復裳漸觸霧邁蓐露葦林宿攀鳥凌嶽岑聆
猿瞰蒙密言止稅峒溪有緬宅暗谷綵紵坐連牀花裙睨
夾轂鷗飛白暎樹篁抽翠翳屋勝探發新謠食代資微祿

常聞書紳言篤敬聖所勗及瓜最可遲折柳情已邈

戲作焦仲卿詩補有序

古人作詩敘事實意有所專辭不無或詳或略良得其理矣藉第令詳其所略略其所詳庸渠不能成章余讀古詩爲焦仲卿妻作悟其工故反其意連類成篇驗爲文何常思心所之路虛入冥言人所不言亦各有取爾也

瀟霍上干霄江水流其傍鬱鬱廬江郡滔滔介南邦皇漢建安中下邑龍舒鄉何有郡功曹姓焦名仲卿十三誦詩書十五嫺律章十七辟公府羔鴈列兩廂盈盈府中步宛宛行循墻府吏家何有有母坐高堂白髮被兩肩目如震電光獨居理中饋門戶有周防春氣動山阿草木吹雜香

府吏休沐歸白馬紫絲韁青郊大堤道紅杏閒垂楊以手挽韁立蔭樹自徬徨不知誰家女提筐行採桑肌膚潔白皙窈窕世無雙鬢髮耀青雲阿那蛾眉長含睇却回身輕軀何洋洋紫綺爲上衣素綺爲下裳孌孌行遲遲動步搖珠璫府吏見此喜卽復到門看朱丹塗中門白堊飾東墻墻東有老姥開門踞胡牀下馬向姥揖問君來何方辭讓善溫文有此馬上郎十指凝脂膏雙頰琢圭璋從容前致辭吹氣如蘭芳直說西家女美麗婉姬姜爲許貴高門伉儷誰所當蘭芝劉氏妹年始十五強深謹守禮儀重關日夜藏詎有令郎君六禮亦未將春風扇蛺蝶淥水浮鴛鴦

乍可宜君子携手入蘭房便當遣媒妁繾綣爲君通揮鞭
返家巷低頭笑不已繫馬掛玉鞭再拜白阿母何意郭門
劉梧桐雙井里有女顏如茶美德工容止求得作兒婦阿
母亦歡喜阿母掉頭答且當相訊問恐是小家子大家閨
閣深沉沉養貴嬪少習列女訓婉婉無尤譽舉動依保姆
不得自由專春秋習禮度宗室陳豆籩秩秩復雍雍變彼
碩女身佻佻小家女未可論親姻外艷裏懷薄何用知女
心却畧再拜跪一言兒當陳皆言此女良鄰里同聲賢美
麗婉姬姜爲人幽且閑夫婦如天地所欲中心歡貴姓不
足令且復愛嬋娟念當失此女惆悵空房單阿母貫汝恣

卽復聽可之饒饒何誼誼遣媒前致辭元纁實筐篚纂組
紛陸離白璧耀日光黃金十二釵盛以碧玉箱載用沙棠
車盤螭織成幄四角流蘓垂乘鴈鳴雝雝擔羊後頭隨車
輪班班轉駐路入女門交錢一百萬雜綵五色絲蜃貝錯
珠槃陳我東西墀納采旋問名九十其文儀開書視吉日
府吏御輪歸同心有比翼連理無分枝一歲眉未舒二歲
情和諧荏苒三載餘幸甚無嫌猜府吏赴郡直慄慄衷腸
摧三月一休沐並坐吹參差柰何阿母嚴奉養義匪虧晨
朝起問安鼎鼎趨中閭紉鍼請補綴羹湯手自治織作分
所當永夜亦不辭顧見但詈罵瞋目顏不怡欲退復不敢

欲進行次且阿母見府吏欸欸多仁慈卽復呼小姑布席
同舖麋但當樂朝夕不宜見蘭芝爲菹常苦鹹和梅常苦
酸烹魚懲羹熱涕醴嫌漿寒摻摻出素手縫爲文錦裙襪
積稱鬻身十幅相駢連中度但言狹不堪奉高尊大家習
女訓婉婉無尤誓舉動依保姆不得自由專媿媿小家女
何當論親姻外艷裏懷薄有此不肖心叱嗟遣之去小吏
勿爲煩不喜見此女令可事他人府吏泣無言躑躅送婦
去他日會相迎今我不得顧連理枝離分鴛鴦兩相慕府
吏赴郡直踽踽公府步白日照衣裳荏苒視景度夜中明
月來解宇澄空素銀箭遞金壺匡牀悲獨寤攬衣束衿帶

徘徊立中露兩地隔相思昭昭共蟾兔蘭芝母家宿清淚
落如注歡愛誓無他可憐丈人怒女子既有行受命天所
賦以身事君子綢繆大義固不言當還歸棄捐在中路雨
降不爲雲葉落亦辭樹雖有親母兄此室非我處日暮心
煩冤默默行復臥夢中見府吏執手一相訴薄劣忤丈人
情知多謬誤被驅無怨言君應諒誠素廓獨抱寒衾悲君
因我故今當並載還與子同翱翔調絲理清瑟爲樂未渠
央府吏默不言奄忽去我傍啼聲一以悲起視天茫茫鬱
鬱何昏昏魂魄四飛揚登車遵往路入門還上堂再拜因
小姑俛首謝尊章丈人顧我笑此事寔尋常唾井非大瑕

且解知忡惶小復相敕教故遣來相迎開我東閣門啓我
嫁時箱玲瓏玉搔頭雙爵金釵黃吳羅襦中單華袿結香
囊蘭薰合歡被迷迭艾都梁鱗礪珠珊瑚瓊瑤交琳瑯衆
諸試佩帶左右觸鏗鏘崔嵬博山爐百獸刻文章葡萄穿
海燕明鏡頰青銅炯炯照我顏峩峩理紅妝玉簪忽復折
墜地聲琅琅本謂平生居忽覺天一方悲風吹薄帷喔喔
聞鷄鳴歷亂想疇昔顛倒著衣裳躡履之寢門下氣瞻審
詳出汲辦晨餐轆轤凍銀牀漑釜燃以萁慊慊炊黃粱三
晨而不歸具膳誰當嘗辛苦謝小姑趨走侍中唐尸饗使
母勞不得相扶將五內坐煎迫中情如沸湯阿兄顧我笑

阿母大歎息以昔復至明從朝日中曷躡嚙當何道耳語
不可識譎譎何誼誼百禮充庭實微聞太守字知復橫相
逼天令府吏歸出門逢路側執手刻密期長寢萬事畢烈
女無二夫義不背君德昏黃羣動靜池水漂碧色弱軀浮
中央哀怨赴冥墨府吏得聞之勿復更淒惻舉身掛樹枝
四體僵且直晨朝門洞開阿母心自疑呼女不聞聲陰風
颯虛帷阿兄共覓取越陌望清池號哭負女歸作計何愚
癡便報府吏聞尋聞遣人來同心有比翼連理無分枝已
已復何云請從心所私兩家各送殯送殯霍山畿輜車晝
白鵠素紼四傍施金鈴拖赤幘丹旒從風飛哀笳夾轂吹

相和殓露詩俱會大道口馬爲仰天嘶阿母哭女來涕下
如縷縻小姑哭嫂來嗚咽清且悲丈人哭婦來悔不相提
携直云烈性女守義諒不回負汝黃泉下報以嬌小兒阿
兄伏地哭面赤汗流漣兩家互相吊哀音薄雲霓爲撫府
吏棺文櫬栢爲題旌以郡功曹年是二十餘壽命何短短
夜臺同所歸兩家各相謝同是自生患雖悔不可追弔者
盈路傍觀者夾路隅萬人行嘆息千人助悲哀車馬到山
岡松柏鬱離離稅駕下雙棺並列班東西芻靈但銜委百
甕醢醢哭汝汝不聞葬汝汝不知湛湛江水清翠巘流
陰翳月出魂歸來携手步遲遲蘭芝自有夫府吏亦有妻
生存異室怨死得同穴居

贈熊雪堂少司馬移疾歸里

先生十年高臥不肯出出佐中樞幾百日掉頭只愛匡廬
好稱憊未是烟霞疾彭蠡秋風七澤寒匡廬雲霧迷林巒
西山寇盜尚竊發天下蒼生亦未安從來弭盜自有術卽
欲銷兵本不難周成況復大和會虞帝只須舞羽于我聞
漢家三葉稱至治詔書每下父老看稍除東濕吏道簡每
重循良民力寬郡國游徼付守令怒馬不覩兵聲謹南北
二軍握居重烟火萬里無凋殘蠲租賑貸多美政大澤深
山無揭竿刺史往往嫺經術昌言不諱盈朝端苞苴罔行

黜陟當畫一規隨法不刊卽今須時次第布必世後仁待
刑措端揆正求黃髮人敷陳況有丹書句平生許身比伊
傅稽古致君豈無具曾陟天卿樊吏清暫叅司馬籌邊裕
曳履猶嗟志不申懸車定悵時難遇石門石室藏書處及
到清明花滿路強起非耽祿萬鍾仍歸坐對雲千樹正是
青芝秀可餐且幸朱顏髮未素傾心果復聽賡颺召保重
來詎衰暮

稽留山人集目錄

第十卷

做帚集

詩一百六首

甲辰元日 喜方貽登第 程邇鴻寓天慶禪房詩

以懷之 方貽寓齋種竹漫成一律 訓吳次公

立秋日懷舍弟天津十二首 贈沈漢乙 已知

送沈儀曹雲中行木金陵 送史兵部雲次權木南

關 廷尉李來園先生移疾將歸招飲有賦 追輓

章孺人殉節二首

陶漢爲中
翰元配也

送張小白旋里 舍

弟將之豫章慨然成咏 甲辰九日芝麓先生招同

吳蘭次水部朱鶴門大行紀伯紫處士白仲調孝廉

集黑窰厰登高拈龍山二韻賦詩紀遊撫今追昔情
見乎辭 甲辰初冬燕邸感懷五首 題查匡來小
像兼懷雲間陸大 送俞以除右諫分守始安 送
張子守禦粵東 李育九武闈高第 胡卜男登第
胡彬甫登第 甲辰冬仲龔芝麓總憲五十初度
再祝芝麓先生應吳臥山太史之命 三祝芝麓
先生應白仲調孝廉之命 喜施愚山少參來都有
贈 和企賢上人牧庵咏卽次元韻二首 訓河間
章郡丞澹公寄懷十首次韻 訓張齊仲 甲辰仲
冬往津門登車口占 初至津門和澹公作卽次原

韻 贈澹公長君長玉 澹公喜余至津門有作并
訓齊仲和章卽次元韻得三十首 陪機石胡先生
登津門玉皇閣十六韻 再登津門城西稽古寺藏
經閣十八韻 自津門旋燕山畱別澹公兼示齊仲
長玉 贈楊闇齋兵憲 旋方貽寓齋作 除夕方
貽邸舍偕子箕廣成庶華飲歲口占

稽留山人集第十卷

甲辰

詩一百六首

武水陳祚明肩倩氏著

甲辰元日

自哭胡宗伯茫然欲廢詩疇依憐食客舊業問經師隔歲
人長夜回春曆首時斐然吾黨彥椒酒送書帷

喜方貽登第

傳經不負編蒲業射策欣看釋褐初好及盛年登史館未
淹三度上公車科名遂蚤非爲幸門第元高不易如萬石
家風躬欲俯卽看立侍鞞金魚

程邇鴻寓天慶禪房詩以懷之

邸第嗟爲客招提憶久棲賓來經案用袖有佛香携待采
芙蓉晚羞將槐柳齊過從吾嬾甚似隔武陵溪

方貽寓齋種竹湯成一律

分得西山種青依小苑墻雨滋新葉潤風裊嫩梢長遂可
藏山翟將因引鳳凰此君看不厭直遣忘他鄉

謝吳次公

長貧嗟士隱失職心不平僂然八尺軀兀傲睨公卿盛才
周八士崇尚魯兩生歲月悲迅川泥塗伏幽衡一椽無考
槃十畝開耦耕襍穢觸炎景結束遊上京狹邪趙與李恭
敬謬將迎不如一囊錢虛使四座傾絡緯應茲鷄哀吟感

同聲相逢邸第閒侘傺故人情窮途日奄暮濡足思倒行
晨興望宛洛鼎食聞鐘鳴吾衰謝時彥來軫子可更贈言
何纏綿調苦難爲廢努力愛景光隨時最令名

立秋日懷舍弟天津十二首

莫言灞漉卽長安幕府西山捲幔看可道何如紅日近離
居已見白雲寒

其二

同爲客子倦緇塵我駐京華爾衛津見說計程三百里
秋風兩地各吹人

其三

鳳凰山麓面西湖三徑淒清秋草蕪一上浮槎隨浪跡客
星長傍海門孤

其四

赤日征途嬾著鞭相思九夏隔風烟離人不及秋光好一
夜輕寒到汝邊

其五

他鄉爲客各依劉望遠虛登王粲樓已恨三秋如一日可
堪今日又逢秋

其六

西望燕山萬疊青天津東去海冥冥懷人但詠池塘草夢

裏重悲白露零

其七

新涼北客換寒衣清淚沾襟兩地揮嘹唳生憎南去鴈滄
江同作一行歸

其八

邸舍津亭便往還愁心終日望青山思兄況隔三千里秋
草萋萋獨掩關

其九

山堂縹緲見青楓直北浮雲蔽遠空獨倚梧桐驚落葉因
悲兩地各飄蓬

其十

鳳闌虹橋策馬過柳條拂地水增波臨流却灑千行淚好
寄愁心向潞河

其十一

在遠逢秋宋玉悲遙憑估客寄新詩浮沉縱不隨流水及
到開函已較遲

其十二

難買扁舟共汝迴津門直下浪如雷不如來看燕山月却
望津門帆影開

贈沈漢乙

久欲裁三賦囂然小萬鍾鳴鞭游紫闕把酒愛青峯通
籍無求逢譚經且未逢愧俄燕市醉不厭慶卿從

其二

花前萊子憶竹下孟公依津邸兼驚坐衡門似息機折腰
水豈屑捉鼻願愁違八詠千秋事烟霞對落暉

已知

已知應嫁女身但滯京華牽犬從教賣乘龍詎可誇贈真
無長物去喜勝貧家卽日游山好蹉跎歲易賒

送沈儀曹雲中行木金陵

四牡侵星旂旆旆僊槎早發銀河際春曹却領水衡錢行

木亦關軍國計新屋翻庠舊屋高民力東南憂不細樵蘇
樹藝十年謀拱把浮沉千里稅君林擘畫無不宜循良歷
試 楓宸知爽鳩最有哀矜色鳴鳥方興禮樂時此行惠
商兼佐國錐刀未使誅求亟勞民可得安堵成天子還矜
露臺值石頭城下水湯湯鍾山牛首雲青蒼登臨更把南
宮筆謝眺驚人不可當我本西湖採山者賣文却走金臺
下連城敢說有靈蛇一顧深能憐駿馬古來識曲聽其真
歌者不辭多苦辛此行永久真相憶珍重清風作頌人

送史兵部雲次榷木南關

勞分水部山衡節却送僊槎漢渚秋及到湖橋真衣錦卽
過里巷亦鳴騶探梅臘雪穿青麓行木春潮漲碧流見說
如雲浮杞梓乘風因念濟川舟

廷尉李來園先生移疾將歸招飲有賦

秋風廷尉起歸心移疾俄抽頭上簪天上履旋行藥緩溪
邊舟漾覓花深卽愁去路迷清漢且戀茲筵布綠陰幸舍
猶依那惜醉食魚不到五湖潯

追輓章孺人殉節二首

陶漢爲中
翰元配也

鑑水名家里兵聲烈婦村霜鋒摧玉貌風珮返貞魂地息
傳烽影磚畱漬血痕清風高嶺接俎豆至今存

其二

念昔鳴機夜將賡偕老詩倉皇驚介馬慷慨賈蛾眉取義
真無忝成名已不知惟將悼亡筆作誄鳳凰池

送張小白旋里

裘馬翩翩紫陌長看君載筆賦靈光相隨京洛瞻焚草
去成都問種桑綵服晨趨思魏闕畫橈秋泛且江鄉
鱸縱美休畱滯桂館將開碣石傍

舍弟將之豫章慨然成詠

不可依劉久因爲汗漫游空囊辭北地長鋏適南州
水濶浮萍散江寒落葉秋飛鳴耐辛苦題彼春令愁

甲辰九日芝麓先生招同吳蘭次水部朱鶴門大行

紀伯紫處士白仲調孝廉集黑窰厰登高拈龍山

二韻賦詩紀游撫今追昔情見乎辭

冬官陶室峙崇墉登望西山繞萬峯九日每逢人憶鱸五
陵遙望馬如龍老餘皂帽羞仍落齋用青蔬爲特供風急
御裘愁向夕深霑醴酒不勝醲

其二

十年名彥滿燕關每從元公曳履閒令節干門常放直秋
風九日此看山阮嵇高會游堪續韓聖趙沂齊名去不還
莫怪羊裘因底濕醉來重染淚痕斑

甲辰初冬燕邸感懷五首

立馬燕山落日青他鄉垂老尚飄零
河流欲合歸帆少去鴈嘹嘹不忍聽

其二

朔風吹葉下燕關久客烏裘未擬還
檻外西湖如屋裏可憐家在鳳皇山

其三

狹邪塵起傍高車斜日經過李趙疎
彈鋏莫爲朱邸客歸來饒有釜中魚

其四

十年閉戶十年游爲客天涯已白頭
歲歲秋風哭兄嫂青

山白骨不曾收

其五

三月無書首重迴故人遙自故鄉來
情知兄弟無衣食及與家書轉畏開

題查匡來小像兼懷雲間陸大

昨向查生問陸生遼東棲泊共巖耕
緣看玉貌圖雙頰爲問霜髯黑幾莖
故國却望翻北地諸君本合侍西清
身窮道泰容無改會許均承雨露榮

送俞以除右諫分守始安

邸舍依棲久離筵嘆謫居民情今日試
兵事漢臣書廬豈

承明厭潭臨鈇鉞虛京華畱滯客從此食無魚

其二

萬里乘駟使千山叱馭勞治裝無長物念我解綈袍客下
虛彈鋏時清果建纓桂林行未久不必擬離騷

送張子守禦粵東

無嗟李廣數偏奇此去專城復建旗射石不妨行獵晚投
壺真與雅歌宜香醪甕熟傾柳子白玉盤堆擘荔支最憶
狹邪同作客燈前驚座月明時

李育九武闈高第

翩翩書記沅元瑜投筆功名薄腐儒射策千言三畧擅穿
楊百步萬人呼高歌穩押休文韻緩帶徐投叔子壺到日
封侯仍退讓雲臺大樹爲君圖

胡卜男登第

才名侍御已難兄槐市譚經傲魯生豈厭生花仍載筆湯
誇聚米更論兵揮鞭天馬追風疾矯矢哀猿抱樹驚直取
黃金印如斗封侯端不羨升卿

胡彬甫登第

天卿從子仲升賢十載談兵早著鞭勇爵再登鳴不後連
城三獻價初傳八門取石堪爲陣七札抨弓盡欲穿見說
封侯饒骨法虎頭真合畫凌烟

甲辰冬仲龔芝麓總憲五十初度
至後春隨一線長元公初度此傳觴年齊伯玉非何有人
比商彭壽未央卜世深謀扶社稷回天片語慰耕桑莫
言髡爲憂時白化日初逢寶曆昌

其二

早逢名成三十年久開憲府紫雲邊歲陽在甲纔逢五弟
子通經欲紀千鳥署高居嚴執法龍門得到喜登僊今朝
綺席笙歌暇可復篝燈讀百篇

其三

豈遲綸閣晉師臣獨座威嚴重秉均武帳不冠仍憚見
西臺予印更誰人生民實藉符公望賓客非關附要津百
歲中書逢累考遙遙直似遡生申

其四

名卿八座有生徒投分無嫌草服趨獻頌隨人仍載筆同
聲媿我廁吹竽多材更美姬公美直節還輕汲黯愚但佐
垂衣登上壽掛瓢獨喜在唐虞

再祝芝麓先生應吳臥山太史之命

作誦吾才忝稱觴客起更詩人情未已元老德難名官興
雲俱遠臣心水並清服官纔五十憂轉爲忠誠

其二

森嚴廉法寄蕭散靜便心綠髯輕朱紱烏臺似碧岑朝因
焚草出暇卽看花吟遂許蓬蒿士從游酒細斟

其三

稜稜高議迴翼翼小心嚴減伎人從憚循墻我自謙毛吹
癢肯索骨鯁口非箝解道知天命從容副具瞻

其四

萬邦爲憲日猶愛穆如詩步韻吟偏穩含毫草不遲正宜
興禮樂實可佐文思重有南山賦深慙下里卑

三祝芝麓先生應白仲調孝廉之命

玉河高柳面朱城亞相開筵絲竹鳴新聲三疊巴人曲一

曲翻宜進十觥

其二

憲府喧闐樂府音耕夫輟耒亦微吟朝紳四座須傾聽身
是蒼生最繫心

其三

偶依同學客 京都長揖中臺汲大夫耕鑿已能忘帝力
從知野老頌非誣

其四

紫庭執法卽中台青髯徐看黃閣開長使昇平容隱逸招
賢不擬曳裾來

喜施愚山少叅來都有贈

不見愚山已七年每懷歷下坐清泉宦情潦倒渾閒事詩
律蒼茫合自然慙喜投牋來日下重逢燒燭話霜前可堪
明發還離別萬里扁舟彭澤烟

和企賢上人牧菴咏卽次元韻二首

精舍依祇樹禪牀坐古藤勞甘修苦行靜獨是高僧法借
三乘演心從七處徵不忘生淨土佛號亦時稱

其二

但解無言理何須繞樹藤一龕聊習靜方丈僅容僧已悟
仍修福深居怕特徵恆沙長利濟不羨紫衣稱

訓河間章郡丞澹公寄懷十首次韻有序

澹公爲先兄齊年友己亥舍弟隨之鄆陽癸卯復
挈來津門今年秋舍弟復往江右津門距都二百
餘里予未得往晤辱
寄以詩依韻奉答

海內誰同調天涯黯自憐何來錦字札忽墮白雲邊未見
猜雙鬢相思耐六年新詩隨日進衰薄愧君賢

其二

同郡兼同舉論文愛我兄偶嵇因叅竊御李亦知榮宿草
悲荒壠飄蓬且舊京死生兼契濶百感涕交橫

其三

分形忘異姓同氣感知音從宦方殊地思歸共一林自携

吾弟往諒厚故人心併與池塘夢懷君江上岑

其四

不遠鄱陽路誰能命駕來量移嗟宦蹟高倡喜詩才右輔
滄瀛郡名都碣石臺客居真密邇吟望重徘徊

其五

久客多相識難忘獨有君已同千里月猶隔數重雲使命
堪頻達民謠實飽聞音書携滿袖翻更惜離羣

其六

五馬津亭路單衣京洛塵林違棲鳳鳥窮擬泣麒麟半刺
仍微祿無家托故人停雲終輟筆含意未能申

其七

月迴湖流白烟高海色青征輶憐小弟幕府從公庭聚映
賢人氣歸漂處士星天津何限柳攀折想長亭

其八

西笑山應見南來信不稀開書聊復慰卽見已多違招我
嫌長阻投君定若歸贈言歌不厭心竟繞梁飛

其九

君到芳菲早差池已歲寒豈無珠作履頻憶鷓爲冠一笑
登堂好三晨行路難惟餘琴在匣待向子期彈

其十

詩理通冥漠神交接混茫我行期十日一醉抵千場隱隱
車沿郭依依榻在堂莫言空跋立河漢不成章

訓張齊仲

齊仲爲康侯弟及
門今在澹公幕齋

錦鯉何來衛水涓官齋九夏湯相思曳裾且幸依吾友襍
被應傷別汝師客久併無王粲賦才高何讓李陵詩歸心
誰不懷尊鱸無柰秋風兩地吹

甲辰仲冬往津門登車口占

不爲干人出風塵更曳裾天涯思會面多恐怨情疎

初至津門和澹公作卽次原韻

六載今重見他時憶百回傳呼啓署急蹙蹙下車來坐卽

開詩帙寒須促酒杯朔風吹客到落日競墩臺

贈澹公長君長玉

吾弟逢人說君才不可當讀書惟閉戶作賦竟升堂可畏
顏如玉無聞鬢已霜時名應避席衰朽謝中郎

澹公喜余至津門有作并訓齊仲和章卽次元韻得

三十首

契濶人難合飄零地本同一來投海曲不遠卽燕中青眼
添杯碧衰顏借燭紅多君成久憶吟望朔雲空

其二

亦知公幕好偏得故人從却想魂頻越今來趼未重孤飛

如獨鶴兩美是雙龍到指窮冬晚彌看冰雪容

其三

人逢如故里弟去隔滄江下壁陳吾榻登樓惜此邦久交
慙謬敬小友足心降獨喜新詩贈連城璧百雙

其四

好會張筵夕明燈設醴時堂前爲上客座裏盡良知營道
曾何得還山未可期不辭今日醉一別又相思

其五

久別同爲客茲行可當歸牽衣曾作夢執手莫仍非冰硯
含毫蘸風簾擊戶飛倡予催急和短景易斜暉

其六

漸老疎拈筆當官喜著書幕中畱阮瑀膝下有相如未羨
雙魚佩看乘駟馬車此身慚嬾媪責子重欷歔

其七

莫嫌仍佐郡多說使君殊却餽虛清橐勤民漸白鬚縈情
忘捷足癖性似微軀且共杯浮綠無論綬未朱

其八

每說杉園勝松篁夾路迷草間饒臥鹿樹上聽鳴鸝小閣
吾家有重湖倚檻低宦游同旅客相與夢清溪

其九

物理何須論吾生亦有涯誰能長作客相見且開懷
吹影從時輩忘形得我儕定文無厭密白璧更磨揩

其十

叱馭至今日携琴獨後來更多詩遣讀久貯酒俱開已失
池塘夢惟餘記室才尊前看載筆此地卽平臺

其十一

愛我兼家弟如君復幾人賦詩輕百首飛竿匝千巡
郢里難爲曲平原畏涉旬但畱張仲在燕喜從良辰

其十二

季子門墻士驂驪久軼羣交情指白水時譽起青雲長缺

游偏壯綈袍贈屢聞主人同泛愛詩思共氤氳

其十三

依依逢異地欵欵晤寒門感舊分生死論交徧弟昆
詩同新好賦情副久要言海國天東北朋從異筮坤

其十四

風塵爲客久茲歲又將闌蹙過扶高屐思歸小冠朱門
賓亦美白雪和皆難預惜之都日羈孤慘不歡

其十五

邸第侯家有君卿慣往還那堪持面目到處候容顏
黯黯單車去盈盈一水間把君詩過日翻恐淚潺湲

其十六

長吏非懷祿幽人不種田相逢率曠野聊共說林泉有日鄰三徑臨風手一編惟畱圯上畧勲業及芳年

其十七

下帷知有客折簡更頻邀競就詩須和生憎路獨遙篝燈延乙夜分韻強今朝歲暮星霜靜官齋對沈寥

其十八

重鎮分雄郡天京屬遠郊五方言語雜二水濁清交客子如飛絮官衙問繫匏驕君堪肆志歸去遂誅茅

其十九

英雄吾豈敢屈指數劉曹榻反勞君下樓看臥我高世誰知士貴客獨有人豪觸目皆珠玉斑璘愛鳳毛

其二十

濁漳來滾滾地凍水無波乘興非舟到中流策馬過見愁神氣盡各已盛名多古跡須頻詠披圖問九河

其二十一

欲去駒仍繫虛慙客未嘉他鄉歌伐木彩筆競生花署井堪投轄河津擬泛槎遲回嗟此別憔悴向京華

其二十二

投君忘異國有友況同方幾得逢茲席無須問故鄉寒因

增戀戀去卽走忙忙何日吳山麓同邀過草堂

其二十三

詞客耽香草同心贈杜蘅詩成併是淚別去若爲情亦卽朝正入堪爲夾路迎肯携鸚鵡客同到鳳凰城

其二十四

聚豈占雲物人真叶地靈向來共明月不見望晨星簡授飛觴席經傳擬易亭醉眸橫夜色列炬點晶熒

其二十五

依人裾每曳求友軾初憑馬廐何須入龍門竟許登新詩吟不厭險韻和相仍惟念南州客淒涼旅泊燈

其二十六

此來勤屢約何日更重游馬繞金臺遠魚通玉澗流嬾過輕李趙易記是何劉率爾驅車便無煩泥我畱

其二十七

風塵聊藉在歲月感銷沉語默雖殊跡文章合寸心天長同舍夕景短閉簾陰名僅關身後人應笑苦吟

其二十八

見許我寧堪逡巡鄭客慙何曾携彩筆強欲傲華簪樹幟應三北安絃聽二南主賓方具美六藝共沉酣

其二十九

畱滯長安道無煩季主占青衫寧久著白髮訝新添政達
從何有吾衰拙不嫌昇平公等致獨便老夫潛

其三十一

入山吾宿諾茅屋置蒼巖樹上瓢長掛雲中藥自鏡少年
堪玉筍老友愛香杉他日行園樂應嫌從事衫

陪機石胡先生登津門玉皇閣十六韻

海曲靈槎過河濱僊觀游盤空登寶閣絕地俯神州帝座
飛檐葢天容肅冕旒雲霞凝碧瓦象緯逼珠樓鬲鬲人烟
合茫茫海氣浮參差羅萬戶清濁滙雙流城勢聯丹檻波
光漾翠幃行人穿小樹去鴈沒長洲水曲迷津渡水膠聚

客舟屋界墟里盡轍亂市門稠結構何年始登臨此日愁
萍蹤長是客蓬首欲何求天路終寥遠鄉關況阻修投入
虛跋涉非土但淹畱稍識無生理難蠲爲食謀不逢霄漢
客無幸訪丹丘

再登津門城西稽古寺藏經閣十八韻

覓勝西郊僻迴鞭並郭行天空龍藏湧風細馬蹄輕路指
紅雲近門臨綠水盈金光浮寶地鈴語沸朱甍梯磴千尋
峻軒欄四望清登攀疲蹇足瞻矚豁幽情市遠城闔隔川
長浦淑橫禾塲分町疇茅宇雜墳塋樵牧微茫影輪轅斷
續聲頽垣崇積葦峭岸插連樾百里窻中盡諸天檻外迎

只疑浮漢渚稍欲望蓬瀛千界金繩絡三車玉篋盛松龕
金像默蓮座海神擎人事從知幻生緣尚有營途窮憐暮
齒世棄耻虛名慙許隨摩詰終難學尚平暝投塵市宿結
束且還京

自津門旋燕山畱別澹公兼示齊仲長玉

君來首夏挈吾弟日夜官齋望我至我行訪君弟已還縱
倒千觴不成醉游子飄零無定期人生會合非容易幕中
張子年少才與我通家喜我來作詩輒得三十首要和未
竟時時催與君唱酬事已慣搖筆雲烟飛爛熳吾老都無
角逐能吟苦或成憔悴慮歲聿云暮難久畱辭君更作長

安游長安不重凌雲賦閣筆堪令十指休雖休十指疲雙
足前睨青驄後丹轂褐衣寬博汝何人引領朱門向騶僕
豈若下簾對詠時墨瀋傾漉酒淋漓此歡忘老恨不久欲
久只有還山宐張子自是金閨彥君家鳳毛才亦擅功名
合付年少人君今仕宦何足戀況我迷途游已倦歸去莫
愁家異縣竟挈妻孥就天目松杉冥濛竹葱蒨朝同登臨
夕歡燕茗盃酒壺筆與硯賦詩千篇亦不厭我弟亦得長
相見獨使青雲各致身成名一日爲人羨已知子虛賦可
凌爲囑陰符策更練

贈楊闇齋兵憲

天津地控衛河湄持節東郊寄保釐氣潤海雲蒸案牘風
清河影漾旌旗官僚共喜瞻依切使命無愁供億疲此地
由來稱輻輳五方歌詠入幽詩

旋方貽寓齋作

復就陳蕃榻仍回阮籍車開門驚伏鼠解橐餉乾魚塵几
誰能拭風窓此定居家人寧遠識疲病歲將除

除夕方貽邸舍偕子箕廣成庶華飲歲口占

除夕他鄉鳳闕邊傳杯邸舍入新年千門爆竹聲如沸疊
鼓催花響並傳絳燭華筵猶守歲瑠鞍玉勒已朝天獨餘
潦倒王生客吟醉徘徊夜未眠

